

欽定剿平粵匪方略

欽定勦平粵匪方略卷三十九 癸丑年

五月十三日巳丁托明阿奏言臣督兵抵鐵佛寺

地方探得逆匪已由亳州竄往歸德臣卽由鐵  
佛寺改道向永城歸德一帶趕往會勦於初六  
日馳抵永城據該縣面稟探得逆匪已於初六  
日由亳州陸路竄往歸德尙有捻匪在亳搶掠  
該縣現無官兵練勇誠恐捻匪挾前痛勦之仇

乘隙勾結回竄藉圖報復請留兵嚴防以資保衛臣查續調未到之綏遠城官兵已到泗州不日即可行抵永城卽將此項官兵截留該縣以備防禦臣親督官兵立刻起程前往歸德一帶截擊會剿奏入

上命軍機大臣傳諭托明阿曰昨因亳州失守賊入豫境當諭令托明阿奕經善祿帶兵馳赴河南探明賊

蹤所在迅速赴援茲據托明阿奏逆匪已竄歸德該將軍卽由鐵佛寺改道趕往會剿並將續調未到之綏遠城官兵截留永城防剿現在逆匪分股欲竄汴梁河南省城兵力單弱著托明阿卽督兵迅赴該處應援毋稍延緩截留永城之兵亦當移緩就急令其前進以備攻剿所有奕經善祿統帶各兵均歸該將軍調遣卽著知會陸應穀合力會剿互爲聲援保衛

河南省城嚴防賊匪北竄

同日代理河南布政使沈兆雲河南按察使林  
揚祖奏言臣等於初十日辰刻接到撫臣陸應  
穀來函知在商邱宋家集與賊接仗得勝不意  
賊由間道潛至歸德府城失守卽帶兵徑赴劉  
家口而賊已先派一萬人進駐該處中途折回  
至歸德城外接戰一晝夜不能得力巳刻馳至

柘城聞賊分二股一走劉家口一趨汴省囑臣等嚴爲豫備臣等查汴省爲直隸門戶城大兵單城中僅有撫標及城守尉兵一千餘名鄉紳團練壯勇一千五百名如賊匪猝至難資抵禦應請

旨速調直隸等省官兵來豫應援臣等惟有嬰城固守以待援兵合集再圖迅掃妖氛再臣等因撫臣

陸應穀現在柘城恐道路阻隔文報不通理合  
繕摺由驛馳奏奏入

上命軍機大臣傳諭陸應穀沈兆雲林揚祖曰昨據陸  
應穀奏大股賊匪欲由柘城直撲汴梁曾諭令托明  
阿奕經善祿江忠源迅速督兵赴援並令恩華帶兵  
趕赴該省會剿茲據沈兆雲等奏賊匪竄入歸德現  
分二股一走劉家口一趨汴省該省兵力過單請調

兵應援本日已諭令勝保帶兵直赴豫省復據托明  
阿奏親督官兵由鐵佛寺起程馳往會剿奕經善祿  
等不日均可趕到陸應穀現在柘城是否爲賊梗阻  
著卽與托明阿等會合夾擊近來軍營習氣患在紀  
律不嚴遇賊輒避守土之官但望調兵救援不能竭  
力防守賊匪未到城中官民先已搬移似此情形卽  
有援兵亦復何益歸德郡城設防多日何以一時遽



爾失守必應嚴叅按律懲辦至河南省城民心最爲  
固結前次祥符大工卽賴該處紳民登城守護得保  
無虞現在省城兵力單薄卽著沈兆澐林揚祖等督  
率地方文武剴切勸諭該省紳民團練鄉勇合力守  
禦以待援兵並隨時嚴查奸細毋令溷入致有疏虞  
江忠源由廣濟赴皖已諭令探明賊蹤改道赴豫該  
撫卽飛催前進協剿可也

上又命軍機大臣傳諭訥爾經額曰逆賊由間道潛至歸德城遽失守現分二股一走劉家口一趨汴省賊勢紛竄豫省情形緊急直隸與河南壤地毗連防堵尤宜嚴密張集馨現駐臨洺關如能出境會剿擊散賊匪自可固畿輔藩籬著該督體察情形妥速籌辦毋失事機該督如須出省督辦省城大員祇有臬司能否得力均須豫爲酌度布置勿致臨事周章

上又命軍機大臣傳諭周天爵曰逆匪竄入河南歸德府城失守賊分兩股一趨劉家口一趨汴梁陸應穀現帶兵在柘城一帶剿賊托明阿奕經善祿之兵均諭令迅赴豫省追剿周天爵此時諒已行抵亳州若跟蹤追剿直入豫境又恐潁亳鳳宿等處土匪勾結江面賊匪乘間北竄該侍郎總宜酌量緩急扼要截擊內顧徐州糧臺外遏賊匪來路埽除土匪保衛皖

疆如擾豫之賊沿河下竄亦可就近截剿

上又命軍機大臣傳諭勝保曰昨因陸應穀先後奏報探聞賊由柘城直竄汴梁本日據沈兆雲等奏歸德府城失守賊分兩股一趨劉家口一趨汴梁現在河南防剿萬分緊急著勝保卽帶赴皖之兵星速兼程馳赴河南探明賊在何處卽由何處進剿萬不可稍有濡滯

上又命軍機大臣傳諭李德曰蒙亳賊匪由宋家集閒道潛至歸德城遽失守現在賊分兩股一走劉家口一趨汴梁已飛飭各路帶兵大員星速前往援剿山東與河南水陸毗連著李德飭令地方文武員弁嚴扼要隘兼防渡口外遏逆賊竄路內緝本境土匪鎮定撫綏均關緊要該撫諒能通籌全局不致稍有疏虞也

上又命軍機大臣傳諭哈芬曰蒙亳賊匪由宋家集間  
道潛至歸德城遽失守現在賊分兩股一走劉家口  
一趨汴梁已飛飭各路帶兵大員星速前往豫省援  
剿豫省四通八達無險可扼山西與該省壤地毗連  
亦應豫防該匪分股奔竄著哈芬妥籌布置派委得  
力員弁前往要隘處所嚴密防堵毋稍疏虞

十四日  
戊午  
琦善慧成陳金綬勝保奏言伏查賊

匪分踞江甯鎮江揚州三城恃爲犄角聲息相通揚城西面一門由臣陳金綬臣勝保督兵進剿北面係臣琦善帶兵攻打東面係臣慧成帶兵督防其南門外有運河一道直通三汊河下達瓜州臣琦善俱派兵嚴防惟瓜州口江面遼闊不能阻截因之賊船得以闌入旣未能杜其江面之往來卽難辨爲何處之竄匪而揚州在

六合儀徵之下距浦口一百八十餘里江岸地  
居上游則與浦口對峙臣琦善恐浦口空虛南  
岸賊船時時潛登北岸防範益加嚴緊雖揚州  
賊匪亦有從舊南門潛出窺探者但一經官兵  
截擊仍卽退縮入城並無由旱路分股竄出之  
事而臣琦善等自四月二十日起攻打揚城七  
晝夜未嘗間斷均經先後奏明臣慧成所奏二



十四日進攻東門正臣琦善會攻西北兩路之際臣琦善於攻打時一經知會臣慧成卽派官兵赴東門合剿查看揚城賊匪負固守拒並無竄意自四月三十日至五月初一日我兵連次剿殺該逆日夜修補城堦守禦益密至各州縣稟報賊情僅憑差探傳聞異詞本非目覩况賊匪詭譎多端往往徧遣奸細布散訛言搖惑衆

聽稍不審慎鮮不被其所紿雷以誠所奏或亦  
得諸傳聞臣勝保現與西凌阿等前往臨淮一  
帶會剿其鳳陽股匪分竄懷遠蒙城業經周天  
爵督帶兵勇馳往剿擊臣琦善於賊匪由滁州  
分竄時卽經飛咨河南山東各撫臣豫爲防範  
並咨行帶兵各員跟蹤追剿杜賊北竄

同日理藩院尙書恩華奏言臣於五月十一日

行抵東阿縣途次接據荷澤縣稟報逆匪於曹  
河上游搶得大船數隻撲過北岸兵力單薄恐  
難抵禦等情伏查兗州係東省水陸衝途距濟  
甯州甚近賊匪旣於曹河上游搶渡濟甯兗州  
實當衝要至直隸大名一帶更宜嚴防所有前  
調各兵臣現已飛飭星夜前進迅速赴兗並移  
咨琦善李德星速派兵赴兗以資應援均奏入

上命軍機大臣傳諭琦善向榮陳金綬許乃釗曰鳳陽股匪無論由金陵分股由揚州竄去此股賊匪現已由安徽竄擾河南歸德失守又分二股一赴汴梁一趨劉家口本日復據恩華奏逆匪於曹河上游搶得大船數隻撲過北岸兵力單弱恐難抵禦等情琦善向榮等統領大兵分駐大江南北原期防剿兼施一面進攻仍一面防賊分竄乃屯兵城下幾及三月至

今一城未能克復又任賊由浦口北竄皖省旣竄之後西凌阿等又不能迅速追剿以致賊勢日肆猖狂現在汴梁省城十分緊急卽山東直隸一帶處處堪虞所有各省官兵均先後調赴該大臣等軍營此時北省徵調緩不濟急幾於無兵可調無款可籌朕日夜焦思寢饋難安琦善向榮等身爲統帥何以通籌全局爲朕分憂耶儻將金陵鎮江揚州剋期收復則

北竄之賊自必聞風膽落該大臣等亦可分兵北來  
遏其肆竄之路現聞勝保已赴河南托明阿等亦計  
日可到歸德赴汴之賊冀可殲除其由劉家口渡河  
股匪僅有恩華李德等抵禦兵力尙單已命慧成馳  
往河北會同勦捕揚州城東卽著福濟帶兵防堵毋  
令空虛現時北省防勦緊要著向榮卽飭瞿騰龍酌  
帶兵勇馳往河南山東一帶確探賊蹤協力攻勦毋

稍遲誤

上又命軍機大臣傳諭恩華曰兗州水陸衝要自應加  
意嚴防而曹河一帶尤爲北渡要路本日已諭令慧  
成督率兵弁迅赴東境由黃河北岸迎頭截擊並著  
恩華統帶已到官兵迎賊堵剿所需馬匹已諭令訥  
爾經額協濟三千匹著卽飛調應用其未到各兵仍  
著催令前進托雲保容照所帶之兵是否應一併撤

同堵賊北竄之路著恩華酌量辦理將撲過黃河之賊痛加勦洗俾不致闌入東境

上又命軍機大臣傳諭慧成福濟曰據恩華奏賊匪於曹河上游搶得大船數隻撲過北岸現催各路官兵前往堵剿已諭令恩華統帶官兵迅往迎擊堵賊北竄之路該處兵力尙單恐難抵禦著慧成酌帶官兵星速折回東境由黃河北岸探明賊蹤迎頭截擊俾



賊不能深入東境其灣頭酌留兵弁著卽交福濟統帶督同查文經防剿毋致疏虞

上又命軍機大臣傳諭李德曰前因逆匪竄擾江南疊次諭令李德嚴防黃河渡口茲據恩華奏稱逆匪於曹河上游搶船偷渡若使該處防守嚴密何至任賊偷渡所謂防河者安在耶現在東省兵力空虛李德得聞此信諒必帶兵擇要堵截茲已諭令恩華帶兵

前往迎勦又命慧成由黃河北岸截擊勿令該匪深入東境著李德速卽籌畫機宜嚴飭地方文武員弁加意防範並將各渡口船隻盡行收至北岸毋得再資賊用

上又命軍機大臣傳諭訥爾經額曰昨因逆匪由安徽竄入河南諭令訥爾經額酌調鎮將等防守要隘畿輔重地最關緊要本日又諭令舒興阿張祥河調陝

甘兵四五千名由河南一路分起前進會同攻剿如  
山東直隸地方喫重卽著北行追擊復諭令哈芬調  
山西兵三千名迅赴直隸交訥爾經額派撥防剿恩  
華行至東阿卽聞賊匪由曹河上游搶船撲過北岸  
現今與李德會同防剿所需馬匹著訥爾經額卽行  
撥付已諭令察哈爾都統迅調馬五千匹解送直隸  
山西以補缺額長蘆鹽運使楊需著該督調往扼要

處所派令帶兵協同防堵

同日周天爵呂賢基奏言粵匪竄入懷遠蒙城  
旋即退出聲言欲赴亳州臣周天爵即督帶兵  
勇自懷遠之包家集起程直趨蒙亳宿永交界  
之雉河集一路迎擊維時將軍托明阿帶兵由  
泗州至宿州臣呂賢基當即商令由鐵佛寺一  
路進兵援亳臣周天爵亦即飛催兵勇合力進

勦正在起行間突聞歸德四門均有賊匪查歸德密邇黃河且西距開封東距徐州均在數百里之內賊匪狡譎異常萬一盜決河隄淹我追兵以便西趨汴省東犯徐州則徐充糧臺均爲震動而隨隄迤北盡成澤國如此則宿州不能北援徐州而決口迤東俱係陸路充曹豐沛之間全失黃河之險且黃河一決直衝洪澤一湖

勢必漫溢而慧成楊以增等各軍後路亦屬可  
虞臣周天爵卽率領兵勇起程馳赴歸德救援  
並擬北趨河隄循河而西迎擊逆賊庶免墮其  
決河之狡計並請

旨飭下各省大臣務須嚴防黃河渡口隄岸其山東之  
曹兗直隸之大名河南之彰德衛輝均在河北  
與歸德鄰近地形犬牙相錯匪徒易於竄匿應

請責成領兵大員加意堵禦以杜蔓延再賊情  
狡獪設續行北竄則臨淮徐宿一帶仍係喫重  
不可不防臣呂賢基已函商善祿截留所帶之  
兵五百名暫住宿州以爲各路聲援又查蒙城  
縣土匪蠭起勢欲踞城臣呂賢基就近派委弁  
兵前往彈壓似可不至別滋事端奏入

上命軍機大臣傳諭周天爵曰前因歸德失守疊諭周

天爵或跟蹤追剿或留辦土匪斟酌妥辦茲據奏稱  
卽日率領兵勇馳赴歸德自應如此辦理此股賊匪  
係由鳳陽竄擾而西當其由臨淮入鳳郡時周天爵  
何以折回宿州當時若能督飭兵勇迅速堵截何至  
任其奔竄擾及豫省乃於賊擾亳州之後又成尾追  
之勢周天爵素稱勇敢所保臧紆青練勇可當一面  
獨不能與賊決一死戰痛加剿洗耶著卽督帶兵勇



兼程馳赴歸德一帶併力攻剿毋稍延緩賊勢甚屬  
飄忽然烏合之衆一經痛剿勢亦易散若不乘其紛  
竄未定及早撲滅燎原之火何所底止該侍郎其何  
以慰朕耶臨淮徐宿各路旣已截留善祿所帶之兵  
五百名以爲聲援蒙城土匪業已委員前往彈壓諒  
不至別生事端仍知會李嘉端呂賢基等嚴防妥辦  
勿稍疏忽

同日陸應穀奏言臣於初八日拔營折回歸德  
應援甫行五里卽據探報賊於初六日潛聚歸  
德東南城外初七日午刻用礮攻城並有奸細  
接應卽由南北兩門搶入郡城失守並稱劉家  
口已有賊匪數千占住將欲渡河等情臣查歸  
德爲汴梁東路門戶被賊攻陷臣所帶兵勇僅  
止三千餘名飭調永城防兵日久未到臣隨與

署副將錫普常阿等密謀布置卽行進兵攻剿  
該逆出城迎拒錫普常阿等奮勇前進臣親督  
諸軍分爲三路攻擊因兵單恐被邀截正在收  
隊賊分兩翼前來抄裏官兵不能支持反爲所  
敗臣一晝夜疾馳二百餘里繞道陳州調齊各  
兵擬由許州一帶馳赴省城救援惟兵力過單  
探聞賊有數萬恐難得手仰懇

天恩迅飭慧成飛速統帶精兵來豫救應賊匪旣占劉  
家口難保不竄山東徑撲直隸畿輔重地尤關  
緊要伏乞

飭調重兵駐紮直隸並請

飭下直隸山東暨山西陝西督撫臣一體嚴密堵截以  
杜竄越至歸德失守進剿失利臣調度無方相  
應請

旨將臣治罪歸德府知府陳介眉係臣調在行營帶領鄉勇隨同進剿戰敗後尙無下落然歸德失守該府亦難辭咎請

旨交部嚴加議處其餘文武各員容臣確查再行彙辦奏入

上命軍機大臣傳諭陸應穀曰據奏歸德失守進剿失利各情現在省城緊要必須嚴防逆匪竄擾

令勝保江忠源各帶赴皖之兵馳赴河南進剿諒已  
兼程前進本日據周天爵奏已帶兵勇馳赴豫省援  
應托明阿等想亦趕到該撫卽會同迅速攻剿所有  
現在河南官兵均歸托明阿調遣並著嚴防黃河渡  
口遏賊匪北竄之路

上又命軍機大臣傳諭舒興阿張祥河曰逆匪竄入河  
南欲撲汴梁並分股由曹河上游渡河入山東界現

在賊勢分竄各路大兵多在淮徐一帶河南山東兵力既形單弱直隸與該二省處處毗連防堵尤關緊要陝甘兵徵調已多但附近河南應援較便著舒興阿張祥河於各標營內就近酌撥精兵四五千名由河南一帶分起前進探明賊蹤相機進剿如山東直隸地方情形喫重卽著北行追剿其潼關等處爲入陝門戶並著實力嚴防以杜賊匪窺伺

上又命軍機大臣傳諭哈芬曰賊匪竄擾河南山東  
在直隸防堵甚爲喫緊該省官兵調赴軍營者一時  
難以撤回著哈芬迅卽揀選精兵三千名馳赴直隸  
交訥爾經額調遣前調山西營馬二千匹赴徐州糧  
臺備用卽著迅催前進現復調察哈爾馬五千匹可  
以抵撥或由該省購備斟酌奏辦

上諭內閣曰逆匪由浦口竄出擾及鳳陽亳州一帶復



乘閒潛竄歸德搶入府城陸應穀親督諸軍分爲三路率同署副將錫普常阿等奮勇前進斃賊無數恐被邀截暫行收隊未能卽時克復郡城陸應穀調度無方咎實難辭著革職留任歸德府知府陳介眉雖先經調赴行營帶領鄉勇隨同剿賊府城失守亦有應得之罪著先行交部嚴加議處現在各路大兵計已趕到著陸應穀會同迅速攻剿毋稍延緩

同日刑部奏言前奉

諭旨將已革漕運總督楊殿邦等交臣部議罪臣等查  
已革漕運總督楊殿邦已革前任鹽運使但明  
倫均係奉

旨前往揚州辦理防堵乃該革員等於逆匪竄入揚城  
之先輒行退守上游以致府城失守實屬防堵  
不力應按律從重發往新疆充當苦差仍遵

諭旨暫留清江浦隨同楊以增辦理防堵帶罪自效奏

八

上諭內閣曰已革漕運總督楊殿邦已革前任鹽運使但明倫均著照部議從重發往新疆充當苦差仍令暫留清江浦隨同楊以增等辦理防堵帶罪自效

同日內閣侍讀學士梁瀚奏言臣閱連日外間奏報賊匪分股竄擾安徽河南現在直隸地方

須趕緊調兵守禦惟久歷戎行熟悉賊情者一時實難其人臣竊思前大學士賽尙阿前兩廣總督徐廣縉均以辦理不善獲咎經會議大臣按律定擬實屬罪無可逭惟賽尙阿前在廣西屢次獲勝且保守廣西湖南兩省城皆能轉危爲安徐廣縉前剿辦凌十八及梧州艇匪亦能迅速蕲事均深悉賊中情形與初次出征者不

同伏查古來名將先獲重譴後立大功者指不  
勝屈卽我

朝乾隆嘉慶年間如阿桂那彥成額勒登保等均  
以負戾之軀懋著偉績誠以使功不如使過自  
古爲然卽現在之統帥如向榮琦善等亦均係  
獲罪發遣之人蒙

恩棄瑕錄用今大江南北卒賴此二人以作保障現在

賊勢日張將才難得合無仰懇

天恩法外施仁

飭令賽尙阿前赴直隸河南交界地方扼要駐紮徐廣  
縉籍隸河南情形較熟請

飭令前赴河南省城幫同陸應穀督辦防剿均求假以  
事權該罪員等具有天良自必倍加感奮以圖  
報效奏入

上諭內閣曰前有旨將賽尙阿徐廣縉按律定爲斬監候秋後處決因思賊匪現由安徽竄入豫省歸德各路帶兵大員奉命徵調赴剿而該革員等以失律羈囚置身事外值此軍務緊急豈容安坐待斃耶賽尙阿著發往直隸交訥爾經額差遣委用徐廣縉著發往河南交陸應穀差遣委用均責令帶罪自效該員等具有天良宜如何感愧力圖報效億再不知奮勉

或有貽誤朕惟執法從事決不寬貸

十五日己未李嘉端奏言接據署壽州金光飭等

稟稱賊自臨淮水陸兩路於四月二十六日午

刻竄入懷遠三十日未刻至蒙城知縣宋維屏

身受多傷立時陣亡又接臬司張印塘稟稱五

月初三日有賊船千餘隻順流直下當卽會同

兼署副將富惠前任副將松安署知府牛鎮署



知縣馮元霍等帶領兵丁登城拒守午刻賊船  
乘風直撲安慶城下開放大礮攻城我兵抵禦  
不住漸次逃散初四丑刻賊遂轟城而入該司  
等率領殘兵二百餘名下城力戰萬難抵敵因  
公同商議本郡城池破壞人民盡逃並無倉庫  
錢糧不如退守距城十餘里之集賢關庶不致  
由此北竄初六午刻賊果分股撲關該司及各

文武督同弁兵激勵該處團練開放連環槍斃賊十餘人始各退回臣查安慶自正月被賊擾後三營兵丁募補甫經足額除分守水陸五十五汛外城防不足千人應用器械亦未全備因飛飭廣東官兵以後隊爲前隊折回安慶交張印塘相機堵剿集賢關爲通北驛路若能扼住爲害猶淺更須嚴守裕溪口此外如和州之烏

江鉞魚嘴無爲州之泥汊河在在皆通巢湖實屬防不勝防且土匪旣多必須隨時搜捕方免勾結臣當督率兵勇一面搜捕一面追剿斷不能株守一隅祇求自保

李嘉端又奏言西凌阿所統黑龍江兵已於初一日行至臨淮臣咨商托明阿囑其在彼駐紮旣可防後路賊匪之上竄並可禦踰淮賊匪之

回擾兼爲四路大兵聲援似於現在機宜大有裨益

李嘉端又奏言臣查四月初九日滁州來稟卽有賊由揚州竄出之語近復有廬鳳等處居民被賊裹脅新經逃出者僉稱揚州竄出之賊共四股其三股坐船南去不知何往此股於初六日至浦口上岸先是臣差楊國慶往揚州大營

探聽軍情於四月初五日自揚帶回勝保致臣  
書函詳覆此事賊由揚州竄出無疑奏入

上命軍機大臣傳諭呂賢基李嘉端曰據李嘉端奏稱  
江面上竄之賊於本月初三日重撲安慶府城初四  
日丑刻失守等語該逆由蒙亳竄入豫境已陷歸德  
北路情形萬分喫緊不意西竄賊船又擾安慶該處  
瘡痍未復何堪再遭蹂躪覽奏實深焦灼集賢關爲

通北要路必應嚴密防守該撫已飭粵兵折回交巢  
司張印塘相機堵剿並令李鴻章帶勇嚴守裕溪口  
鳳定懷壽等處土匪均責令該地方認真緝拏並派  
李登洲往來搜捕俱著照所奏辦理現在豫省緊急  
周天爵已帶兵赴援勢不能兼顧南路卽各路赴豫  
之兵亦難驟令折回呂賢基係特派辦理團練之員  
當此時事多艱惟當會同該撫督飭幫辦團練之署

廬鳳道給事中袁甲三荆宜施道趙昀並在籍之前  
任南河總督潘錫恩等剴切宣布朕意無論紳民人  
等果能奮勇殺賊嚴緝土匪著有成效者卽著破格  
保奏朕必立沛殊恩此項義勇別處不得徵調以本  
地之勇勦本地之賊較客兵更爲得力且紳民等各  
有身家與其被難轉徙何如互相保衛諒必能深明  
大義志切同仇以期共膺懋賞也

上諭內閣曰安慶自被賊蹂躪之後一切戰守之具尙未全備該臬司張印塘等因賊船猝至兵單退守雖與擁兵失事者有間然究係不能禦賊罪無可辭安徽按察使張印塘兼署副將富惠前任副將松安署知府牛鎮署知縣馮元霍均著革職應得罪名著刑部分別定擬具奏現當防堵喫緊之時未便令該革員等置身事外仍著留於軍營帶罪自效蒙城縣知



縣宋維屏督兵勦賊身受多傷以致陣亡不愧守土之官宋維屏著交部從優議卹

同日張芾奏言據饒九道義泰稟稱准向榮札開四月二十七日有賊船千餘隻乘風揚帆直上當令已革提督福興等帶兵勇二千名馳往朶石截擊亥刻復據探報實係賊船回竄而金陵賊匪仍復如故是否分股竄擾上游抑係全

行逃遁一面偵探一面仍飭福興等帶兵趕赴  
太平蕪湖一帶截剿等語該道當與護九江鎮  
總兵羅玉斌面商九江存兵無多亟應厚集兵  
勇以資堵禦查有湖北臬司江忠源帶楚勇一  
千七百名馳赴江南會剿不日即可到潯擬請  
留潯堵剿等情查逆匪詭譎異常其順風揚帆  
未必卽係回竄江省該鎮道所稟爲九江而言

未能熟計全局自應通盤籌畫方臻妥協臣當  
飛飭江忠源迅赴安慶下游察看緩急或赴太  
平蕪湖會同江南官兵迎頭堵截或探賊船已  
越過太平徑犯皖城卽折回九江下游擇要扼  
剿至九江存兵無多不敷調遣一旦該逆回竄  
猝不及防實堪隱憂可否請

旨飭催湖北臬司江忠源迅赴安徽下游迎剿儘逆匪

竟係全股由皖回竄卽飭該臬司折回或在安徽之華陽鎮或在彭澤縣之小孤山擇要扼剿爲江楚聲援儻被賊竄越無論擾及何地卽尾追夾擊臣當與湖廣督撫臣速籌兵勇併力堵剿以杜竄逸

張芾又奏言臣接據九江探報向榮之子向繼雄與賊接仗敗退賊船追至銅陵向繼雄已退

駐九江查九江存兵無多惟湖北距九江不遠  
尙易徵調且該逆果係竄擾上游湖北亦應嚴  
防與其株守本省不若與江西併力合剿互相  
應援聲勢較壯除飛調顧袁各營兵來省外相  
應請

旨飭下湖廣督撫臣迅速挑選精兵三千名來江會剿  
並請

飭令向榮探明逆匪如實係回竄立即派委大員統帶重兵尾追截擊以分賊勢奏入

上命軍機大臣傳諭張亮基崇綸張芾曰據張芾奏向榮之子向繼雄與賊打仗敗回九江而李嘉端亦有賊船重竄安慶該處文武退守集賢關之奏是此項船隻不盡係脅從解散之船沿江一帶自應合力攻剿該撫業經飛調顧袁各處官兵來省卽著知照湖

北張亮基等會商堵擊一面認真舉行團練以定人心  
儻江岸情形緊要必須出省調度卽著酌量前往  
勿徒株守南昌張亮基等亦當實力偵探迅派精兵  
出境應援萬不可專恃設防徒分畛域無濟於事江  
忠源昨已疊降諭旨令其馳赴河南此時歸德失守  
賊近黃河北省軍情重於江路勢不能不先其所急  
如該臬司未出江境卽著張芾催令兼程前進毋誤

事機

上又命軍機大臣傳諭琦善向榮怡良陳金綬許乃釗  
曰現在賊匪回竄安慶失守並上竄九江籌防甚急  
前因賊匪分踞三城疊令琦善向榮督兵速剿及早  
克復並嚴防其分竄各路乃至今未能收一城而金  
陵揚州又任賊匪分竄自皖而豫汴梁戒嚴安慶復  
被竄入賊兵四出防堵愈難現在賊船千餘隻溯流



上竄聞向榮遣伊子向繼雄前往追擊復經敗退究  
竟此項賊船是否卽江南遣散之船抑係被攻逃遁  
賊船旣多回竄我軍艇船師船早經到齊正當乘勢  
衝擊著向榮怡良許乃釗督飭麟桂和春等將江面  
賊船盡行攻剿焚燬不可再延時日至各城逆匪屢  
被殲擒又多竄出其死黨諒必不多著該大臣等設  
法趕緊進攻儻三城以次收復則北竄之賊自必聞

風膽落分兵追剿更易爲功現在賊匪又竄入安慶  
於三城之外又營窟穴若水路不將賊船截斷但於  
陸路南岸頓兵不進甘墮賊匪牽掣奸計自問於心  
安乎否乎當此萬分喫緊之時籌餉旣難徵調亦復  
不易朕每一念及寢食俱廢該大臣等統領大兵應  
如何速圖進取以副朕望耶

同日李德奏言安徽匪徒竄擾蒙亳一帶東省

曹單兩縣最爲切近當密飭曹縣知縣姚景崇署單縣知縣宋煒圖將劉董二口渡船全數收至北岸臣俟布置妥協卽日兼程前赴曹單沿河督兵迎勦惟曹州兵力單薄無可另撥若請調鄰省亦屬緩不濟急查行抵東境之奉天吉林官兵一千二百五十名並改由水路之黑龍江官兵仰懇

天恩准予一併就近截留均飭前赴劉家口一帶分布  
要害相機堵截奏入

上諭曰現時東省情形緊急無論何路官兵酌量截留  
與恩華瑞昌商之

李德又奏言臣前以清江浦爲第一路由將軍  
托明阿帶兵駐紮王家營爲第二路由侍郎奕  
經駐紮其三路之重興四路之順河集五路之

宿遷大營由臣督同鎮將等駐紮正望師旅齊  
來分別布置旋因皖省土匪竄擾震動徐州托  
明阿奕經兩路防兵均奉

諭旨迎勦此誠先其所急遠勝株守一隅惟清江浦有  
河臣楊以增堵禦於前而王家營無重兵援應  
於後且重興以至宿遷防兵僅一千名遇有緩  
急未免分撥不敷查直隸兵習藝尙精秉性呆

敢臣服官直省二十餘年深知士卒之心樂爲  
驅策且距東數百里較陝甘踰關越嶺者勞逸  
懸殊若得二千名橐韃而來因時操練以戰以  
守洵屬得力竊維堂奧之安先在藩籬之固東  
省乃畿輔屏蔽防範極宜謹嚴臣已飛咨曹州  
鎮臣三星保就近帶兵親駐劉家口嚴密防禦  
仍由臣隨時相機策應不敢稍有鬆懈奏入

上命軍機大臣傳諭李德曰據奏東省布置情形請添調直隸官兵二千名以資戰守等語逆匪現已由皖竄入河南攻陷歸德府直隸爲畿疆重地正當堵剿喫緊之際已諭訥爾經額派兵扼要防守即可出境協剿現在直隸營兵調赴琦善恩華等軍營已有六七千名若再調往山東則畿輔兵力益形單弱著李德體察機宜隨時與訥爾經額知照互爲聲援並就

地方情形飭屬曉諭紳耆實力團練自固桑梓官民合力保衛衆志自可成城如紳民中有奮勉立功材具可用者卽著覈實保奏候朕施恩據稱曹州鎮總兵三星保帶兵駐紮劉家口何以曹河上游有搶船偷渡之賊若能將船隻收盡或乘賊偷渡擊之何致任其肆竄該撫務當派委得力員弁加意巡防免致貽誤



上又命軍機大臣傳諭訥爾經額曰本日據李德奏請  
調直隸精兵二千名來東操練等語直隸爲畿輔重  
地與河南山東接壤處所亟應嚴密布置此時固不  
能再加徵調以分兵力然與其畫地自守不如出境  
協剿卽以自固藩籬著該督選派精兵於河南山東  
兩省毗連處所準備嚴防確探賊蹤出境會剿現在  
山東劉家口已有股匪渡河恩華帶兵迎剿如兵力

尙單卽著誦爾經額酌量撥兵援應至畿疆重地一切布置朕惟誦爾經額是賴其隨時妥辦以慰朕懷  
同日周天爵奏言臣馳抵永城詢知逆匪由宋家集北奔黃河南岸之劉家口查該處爲渡黃要道西北通曹單東北通濟甯爲今之計臣惟剋期彙齊兵勇決計拌死直取黃河南岸截賊東趨之路亟應請

旨飭下侍郎奕經迅赴徐州保護糧臺堵其歸路撫臣

李德折回曹克退賊北竄托明阿善祿等帶兵  
現駐歸德池東之會亭臣已飛咨就近速赴劉  
家口合力追剿奏入

上諭曰汝能追賊至河南甚好奕經已飭令帶兵剿賊  
此時若令保守徐州糧臺尙可行